



Ciorclán 0048/2023

**Chuig: Údaráis Bhainistíochta na mBunscoileanna, na Meánscoileanna,  
na bPobalscoileanna agus na Scoileanna Cuimsitheacha Aitheanta  
agus  
Príomhfheidhmeannaigh na mBord Oideachais agus Oiliúna**

**An Scéim Saoire Uchtaíche do Chúntóirí Riachtanas Speisialta atá  
fostaithe i mBunscoileanna agus Iar-bhunscoileanna Aitheanta**

De bhun na cumhachta atá in alt 24 den Acht Oideachais (arna leasú), ordáíonn an tAire Oideachais d'fhostóirí na nósanna imeachta atá luaite a chur chun feidhme do chúntóirí incháilithe riachtanas speisialta atá fostaithe i bpoist cheadaithe a chistítear le hairgead ón Oireachtas.

Ní mór do gach fostóir agus do gach cúntóir riachtanas speisialta cloí leis na téarmaí agus coinníollacha comhaontaithe atá luaite, le héifeacht ó dháta an Chiorcláin seo.

Gabhann an Ciorclán seo ionad na gCiorclán, na meabhrán, na rialacha agus na rialachán uile roimhe i ndáil le Saoire Uchtaíoch do chúntóirí riachtanas speisialta atá fostaithe i mbunscoileanna agus iar-bhunscoileanna aitheanta.

Cinntigh go scaipfead an Ciorclán seo ar gach comhalta den Bhord Bainistíochta/den Bhord Oideachais agus Oiliúna agus go dtarraingeofar aird na gcúntóirí riachtanas speisialta uile atá fostaithe agat ar a bhfuil ann, lena n-áirítear iad sin atá as láthair le cead.

Ba cheart gach ceist a chur ar dtús ar an bhfostóir, ar féidir go mbeidh sé ag iarraidh dul i gcomhairle lena eagraíocht ionadaíoch ina leith. Féadfar aon cheisteanna eile a chur ar an Roinn ach ríomhphost a chur chuig na seoltaí seo a leanas:

- a) Ceisteanna maidir leis na téarmaí agus coinníollacha do Shaoire Uchtaíoch:- [teachersna@education.gov.ie](mailto:teachersna@education.gov.ie)
- b) Ceisteanna maidir le saoire a thairfeadh ar an gCóras Éileamh ar Líne:- [onlineclaims@education.gov.ie](mailto:onlineclaims@education.gov.ie)
- c) Ceisteanna maidir le tuarastal:- [Foirm Fiosrúcháin Párolla \(education.gov.ie\)](http://www.education.gov.ie/foirm-fiosruchain-parolla)

Is féidir an Ciorclán seo a rochtain ar shuíomh Gréasáin na Roinne ag [www.gov.ie](http://www.gov.ie).

James Walsh  
Príomhoifigeach  
An Rannán Téarmaí agus Coinníollacha -  
Múinteoirí agus Cúntóirí Riachtanas Speisialta

18 Meán Fómhair 2023

## Clár Ábhar

Sainmhíithe agus Giorrúcháin .....	3
Forálacha Ginearálta.....	5
1. An Scéim Saoire Uchtaíche .....	8
2. Teidlíocht i leith Saoire Uchtaíoch.....	8
3. Saoire Uchtaíoch Reachtúil Neamhíoctha Bhreise .....	8
4. An t-ord nach mór Saoire Uchtaíoch a thógáil ann .....	9
5. Am saor ón obair le haghaidh freastal ar Ranganna agus Cruinnithe Réamh-Uchtála laistigh den Stát .....	9
6. Nósanna Imeachta Iarratais.....	9
7. Saoire a Thaifeadadh.....	10
8. Socruithe Pá agus Sochar Uchtaíoch .....	10
9. Stádas le linn Saoire Uchtaíoch .....	11
10. Cúntóir Riachtanas Speisialta Ionaid .....	11
11. Fostaíocht le linn Saoire Uchtaíoch a Thógáil .....	11
12. Saoire Uchtaíoch a Chur ar Atráth.....	12
13. Saoire Tuismitheora Mharthanaigh .....	13
14. Saoire Uchtaíoch Reachtúil Neamhíoctha Bhreise/Saoire Reachtúil Neamhíoctha Bhreise Tuismitheora Mharthanaigh a Fhoirceannadh.....	13
15. Suíomh a Fhoirceannadh.....	14
16. Filleadh ar an obair tar éis Saoire Uchtaíoch .....	14
17. Teidlíocht Reachtúil i leith Saoire Bhliantúil/Laethanta Saoire Poiblí.....	14
Aguisín A - Foirm Iarratais ar Shaoire Uchtaíoch .....	16
Aguisín B - Nósanna imeachta a bhaineann le Saoire Uchtaíoch a Thaifeadadh ar an gCóras Éileamh ar Líne.....	19
Aguisín C - Ríomh Samplach Saoire Uchtaíche.....	20

## **Sainmhínte agus Giorrúcháin**

Chun críche an Chiorcláin seo, beidh an bhrí a shanntar dóibh leis na téarmaí seo a leanas, ach amháin i gcás go léireoidh an comhthéacs a mhalairt:

**Tuismitheoir Uchtála** – ciallaíonn sé seo uchtaitheoir cáilitheach nó tuismitheoir marthanach de réir bhrí na sainmhínte ar ‘uchtaitheoir cáilitheach’ agus ar ‘tuismitheoir marthanach’ in alt 2(1) den Acht um Shaoire Uchtaíoch, 1995 (arna leasú le halt 5 den Acht um Shaoire Theaghlaigh agus Forálacha Ilghnéitheacha, 2021).

**Conradh Leantach** – ciallaíonn sé seo conradh a thagann go díreach sna sála ar an gconradh roimhe, rud nach bhfuil aon bhriseadh i seirbhís i gceist leis: e.g., i gcás go dtiocfaidh conradh amháin chun deiridh an 31 Lúnasa agus go mbeidh feidhm ag an gconradh nua ón 1 Meán Fómhair an bhliain chéanna.

**Páirtneír Sibhialta** – mar atá sainmhínte in alt 3 den Acht um Páirtneireacht Sibhialta agus um Chearta agus Oibleagáidí Áirithe de chuid Comhchónaitheoirí, 2010.

**Comhchónaitheoir** – mar atá sainmhínte in alt 172(1) den Acht um Páirtneireacht Sibhialta agus um Chearta agus Oibleagáidí Áirithe de chuid Comhchónaitheoirí, 2010.

**Lánúin** – ciallaíonn sé seo, i ndáil leis an sainmhíniú ar ‘uchtaitheoir cáilitheach’, lánúin phósta, lánúin ar páirtneírí sibhialta dá chéile iad nó lánúin chomhchónaitheach.

**Lá Suímh** – ciallaíonn sé seo an lá a dhéantar leanbh, atá uchtaithe nó atá le huchtú, a shuíomh go fisiciúil faoi chúram an tuismitheora iomchuí d’fhonn an leanbh a uchtú nó, i gcás uchtáil idir tíortha a dhéantar lasmuigh den Stát i gcás nach ndearnadh an leanbh a shuíomh faoi chúram an tuismitheora uchtála iomchuí roimhe sin, an lá a dhéantar an leanbh a shuíomh amhlaidh tar éis na huchtála.

**RCS** – ciallaíonn sé seo an Roinn Coimirce Sóisialaí.

**Fostóir** – i gcás gairmscoileanna/coláistí pobail agus pobalscoileanna náisiúnta, ciallaíonn sé seo Bord Oideachais agus Oiliúna agus, i gcás bunscoileanna (seachas pobalscoileanna náisiúnta), meánscoileanna deonacha, pobalscoileanna agus scoileanna cuimsitheacha, ciallaíonn sé seo Bord Bainistíochta/Bainisteoir. Féadfaidh an Bord Oideachais agus Oiliúna nó an Bord Bainistíochta/an Bainisteoir freagracht as nithe atá leagtha amach sa Chiorclán seo a tharmligean, de réir mar is cuí.

**ETB** – ciallaíonn sé seo Bord Oideachais agus Oiliúna a bunaíodh faoin Acht um Boird Oideachais agus Oiliúna, 2013, agus a rialaítear dá réir.

**An Bhliain Saoire** – ciallaíonn sé seo an tréimhse ón 1 Meán Fómhair go dtí an 31 Lúnasa gach bliain, agus an dá dháta sin san áireamh.

**An Córas Éileamh ar Líne** – ciallaíonn sé seo an córas a úsáidtear chun neamhláithreachtaí a thaifeadadh agus chun éilimh a chur isteach lena n-íoc le cúntóirí riachtanas speisialta ionaid. Tá an córas i bhfeidhm i mbunscoileanna, i meánscoileanna deonacha, i bpobalscoileanna agus i scoileanna cuimsitheacha faoi láthair.

**Pámháistir** – ciallaíonn sé seo an eagraíocht atá i gceannas ar thuarastail a íoc. Is í an Roinn Oideachais an pámháistir i gcás cúntóirí riachtanas speisialta i mbunscoileanna (lena n-áirítear i bpobalscoileanna náisiúnta), i meánscoileanna deonacha, i bpobalscoileanna agus i scoileanna cuimsitheacha, agus is iad na Boird Oideachais agus Oiliúna an pámháistir i gcás cúntóirí riachtanas speisialta i ngairmscoileanna/i gcoláistí pobail.

**ÁSPC** – ciallaíonn sé seo Árachas Sóisialach Pá-Choibhneasa.

**Uchtaitheoir Cáilitheach** – ciallaíonn sé seo, i ndáil le leanbh atá uchtaithe, nó atá le huchtú, an t-uchtaitheoir cáilitheach, de réir bhrí Acht 1995 (arna leasú leis an Acht um Shaoire Theaghlaigh agus Forálacha Ilghnéitheacha, 2021) de chuid an linbh agus folaíonn sé, chun críocha an Chiorcláin seo, duine a bheadh ina uchtaitheoir cáilitheach nó ina huchtaitheoir cáilitheach murach nach fostaí é nó í.

**Scoil Aitheanta** – ciallaíonn sé seo scoil atá aitheanta ag an Aire Oideachais de réir alt 10 den Acht Oideachais, 1998.

**Scoilbhliain** – ciallaíonn sé seo an tréimhse a shaineoidh an tAire Oideachais ó am go chéile. San am i láthair, tosaíonn sí an 1 Meán Fómhair agus críochnaíonn sí an 31 Lúnasa.

**Uchtaitheoir Aonair** – ciallaíonn sé seo cúntóir riachtanas speisialta ar cuireadh leanbh faoina c(h)úram aonair, nó a bhfuil leanbh le cur faoina c(h)úram aonair, d'fhonn ordú uchtála a dhéanamh nó d'fhonn uchtáil choigríche a dhéanamh nó tar éis aon uchtáil den sórt sin.

**Tuismitheoir Marthanach** – ciallaíonn sé seo tuismitheoir de réir bhrí an Achta um Shaoire agus Sochar Tuismitheora, 2019, agus mar atá sainmhínithe in alt 2(1) den Acht um Shaoire Uchtaíoch (mar a leasaíodh an dá Phríomh-Acht leis an [Acht um Shaoire Theaghlaigh agus Forálacha Ilghnéitheacha, 2021](#)).

**SNA** – Cúntóir Riachtanas Speisialta

**An Roinn** – ciallaíonn sé seo an [Roinn Oideachais](#).

## Forálacha Ginearálta

### 1. Beartas an Fhostóra maidir le Neamhláithreachtaí Cúntóra Riachtanas Speisialta

- 1.1 Déanfaidh gach fostóir beartas a fhorbairt agus a chothabháil maidir le neamhláithreachtaí cúntóra riachtanas speisialta. Agus an beartas á dhréachtú, ní mór tús áite a thabhairt do leas agus riachtanais oideachais na ndaltaí thar rud ar bith eile. Ní mór an beartas a bheith i gcomhréir le rialacha an Chiorcláin seo freisin.

### 2. Saoire a Thaifeadadh

- 2.1 Ní mór gach saoire cheadaithe íoctha agus neamhíoctha, is cuma cé acu atá nó nach bhfuil cúntóir riachtanas speisialta ionaid fostaithe, a thaifeadadh ar bhealach tráthúil ar an gCóras Éileamh ar Líne/ar chóras an Bhoird Oideachais agus Oiliúna lena mbaineann. Is féidir go dtiocfaidh ró-íocaíochtaí tuarastail as aon mhainneachtain déanamh amhlaidh.
- 2.2 I gcás go ndéanfar ró-íocaíocht tuarastail, aisghabhfad an ró-íocaíocht ina hiomláine ó íocaíochtaí tuarastail a gheobhaidh an cúntóir riachtanas speisialta amach anseo, ar aon dul leis na foilseacháin iomchuí ón Roinn.
- 2.3 I gcás go n-íocfar Sochar ón Roinn Coimirce Sóisialaí le cúntóir riachtanas speisialta atá ag baint leas as saoire reachtúil, féadfar an Sochar a aicmiú mar fhoinsé ioncaim inchánach. Maidir leis sin, is ar an gcúntóir riachtanas speisialta atá an fhreagracht as é/í féin a chur ar an eolas faoin bhfaisnéis is cothroime le dáta ar shuíomh Gréasáin na Roinne Coimirce Sóisialaí ag an nasc seo a leanas: [www.gov.ie](http://www.gov.ie).
- 2.4 Is ar an gcúntóir riachtanas speisialta atá an fhreagracht deiridh as a bheith ar an eolas faoi théarmaí agus coinníollacha gach Scéime Saoire sula ndéanfaidh sé/sí iarratas ar shaoire, agus ní mór dó/di faisnéis chruinn a sholáthar ina (h)iarratas ar shaoire.
- 2.5 Is ar an bhfostóir atá an fhreagracht as a bheith ar an eolas faoi théarmaí agus coinníollacha gach Scéime Saoire agus a chinntiú go gcomhlíonfaidh aon saoire a cheadófar na critéir incháilitheachta shonracha, mar atá mionsonraithe sa Chiorclán seo. Is ar an bhfostóir freisin atá an fhreagracht as a chinntiú go bhfuil an tsaoire cheadaithe atá taifeadta ar an gCóras Éileamh ar Líne/ar chóras an Bhoird Oideachais agus Oiliúna lena mbaineann ag teacht le taifead saoire an chúntóra riachtanas speisialta.
- 2.6 Ní fhéadfaidh an Roinn/an Bord Oideachais agus Oiliúna aon saoire atá taifeadta ar an gCóras Éileamh ar Líne/ar chóras an Bhoird Oideachais agus Oiliúna lena mbaineann a athrú ina dhiaidh sin, ach amháin sna himthosca is eisceachtúla.

### **3. Faireachán a Dhéanamh ar Shaoire**

3.1 Ar aon dul leis an dea-chleachtas, ba cheart don fhostóir faireachán a dhéanamh ar neamhláithreachtaí chun patrúin a d'fhéadfadh a bheith ina n-ábhar imní a shainaithint ar mhaithe le tacú le folláine an chúntóra riachtanas speisialta.

### **4. Teidlíochtaí Saoire do Cheapacháin Téarma Shocraithe/Chuspóra Shocraithe**

4.1 Aon chúntóir riachtanas speisialta atá ar chonradh fostaíochta téarma shocraithe/cuspóra shocraithe, beidh lánteidlíochtaí saoire aige/aici i leith saoirí reachtúla le linn théarma an chonartha. Is féidir go mbeidh sé/sí i dteideal cineálacha saoire eile freisin. I gcás go ndeonófar nó go dtógfear saoire den sórt sin, níor cheart aon difear a dhéanamh don cheapachán téarma shocraithe/cuspóra shocraithe ná do cheapachán den sórt sin a athnuachan.

4.2 Scoirfidh cúntóir riachtanas speisialta de bheith i dteideal saoire ar dhul in éag an chonartha, i gcás nach ndéanfar an conradh sin a athnuachan. Ní scoirfidh cúntóir riachtanas speisialta de bheith i dteideal saoire, áfach, i gcás go mbeidh conradh leantach i bpost ceadaithe cúntóra riachtanas speisialta a chistítear le hairgead ón Oireachtas ag teacht go díreach sna sála ar an gconradh sin.

### **5. Asbhaintí Deonacha**

5.1 Scoirfear d'asbhaintí deonacha a dhéanamh ón tuarastal a luaithe a thosóidh cúntóir riachtanas speisialta aon chineál saoire neamhíochta. Le linn do chúntóir riachtanas speisialta bheith ar shaoire neamhíochta, coinneofar mionsonraí faoi na hasbhaintí deonacha ar a t(h)aifead párolla. Tosófar ar aon asbhaintí a rinneadh roimh shaoire neamhíochta an chúntóra riachtanas speisialta a dhéanamh an athuir a luaithe a fhillfidh sé/sí ar an bpárolla. Déanfar amhlaidh ach amháin i gcás go n-iarrfaidh an cúntóir riachtanas speisialta ar an ngníomhaireacht asbhaintí scor d'asbhaintí a dhéanamh ar dháta ar leith. Ní dhéanfaidh an Pámháistir aon asbhaint i leith aon mhéideanna carntha neamhíochta a bheidh ann le linn na saoire neamhíochta.

5.2 Tá sé de fhreagracht ar an gcúntóir riachtanas speisialta atá ag baint leas as saoire neamhíochta, agus air/uirthi amháin, a chinntiú nach rachaidh asbhaintí deonacha ag an bhfoinse i léig, amhail síntiúis cheardchumainn, asbhaintí comhair creidmheasa, etc.

5.3 Níl an Pámháistir faoi dhliteanas i leith dul i léig polasaithe de chineál ar bith. Is féidir tuilleadh mionsonraí maidir le hasbhaintí deonacha a fháil ar shuíomh Gréasáin na Roinne ag [gov.ie](http://gov.ie). Ba cheart do chúntóirí riachtanas speisialta atá fostaithe ag Boird Oideachais agus Oiliúna teagmháil a dhéanamh lena bhfostóir ina leith sin.

5.4 Ní mór aon iarmhéideanna atá le híoc ag cúntóirí riachtanas speisialta atá páirteach sa Scéim Rothaíochta chun na hOibre nó sa Scéim Pas

Taistil a ghlanadh roimh an bpárolla deiridh i nDeireadh Fómhair na bliana féilire inar thosaigh sé/sí ar pháirt a ghlacadh sa scéim.

## **6. Teagmháil le linn Saoire**

- 6.1 Ar mhaithe le cultúr dearfach folláine a chothabháil sa scoil, meastar gur dea-chleachtas é teagmháil chuí a choinneáil idir an fostóir agus an cúntóir riachtanas speisialta le linn tréimhsí saoire. Le linn na teagmhála sin, ba cheart díriú ar leas an chúntóra riachtanas speisialta agus ar a f(h)illeadh rathúil ar an obair a éascú.
- 6.2 I gcás gur cuí déanamh amhlaidh, ba cheart don fhostóir agus don chúntóir riachtanas speisialta comhrá ‘filleadh ar an obair’ a shocrú tráth a fhillfidh sé/sí ar dualgas tar éis tréimhse saoire, chun cabhrú leis an gcúntóir riachtanas speisialta aistriú ar ais chuig an obair.

## **7. Comhlíonadh**

- 7.1 Is faoi na nósanna imeachta araíonachta comhaontaithe a fhéadfar déileáil le haon mhainneachtain cloí leis na rialacháin agus na nósanna imeachta atá leagtha amach sa Chiorclán seo agus is féidir go scoirfead de thuarastal a íoc le cúntóir riachtanas speisialta agus/nó go dtarraingeofar cumhdach ionaid siar do scoileanna dá bharr sin.
- 7.2 I gcás neamhláithreachta neamhcheadaithe, ba cheart fógra a thabhairt don chúntóir riachtanas speisialta gurb é an toradh a bheidh ar aon neamhláithreachta den sórt sin go dtarlóidh sé, i gcás scoileanna a úsáideann Córas Éileamh ar Líne na Roinne, go ndéarfadh an fostóir leis an Roinn an neamhláithreachta a thaifeadadh mar Shaoire Neamhcheadaithe (neamhíoctha) ar an gCóras Éileamh ar Líne. I gcás scoileanna Boird Oideachais agus Oiliúna, taifeadfaidh an fostóir an neamhláithreachta neamhcheadaithe ar chóras an Bhoird Oideachais agus Oiliúna lena mbaineann.

## **8. Seoladh Comhfhreagrais**

- 8.1 Seolfadh an fostóir an comhfhreagrais riachtanach ar fad chuig an gcúntóir riachtanas speisialta ach úsáid a bhaint as an seoladh ríomhphoist pearsanta/an seoladh baile ba dhéanaí a cuireadh in iúl. Ní bheidh aon locht ar an bhfostóir i gcás nach bhfaighidh an cúntóir riachtanas speisialta an comhfhreagrais sin.

## **9. Doiciméid a Choinneáil**

- 9.1 I dteannta na dtaifead pearsanra lena mbaineann, ní mór don fhostóir na doiciméid uile a bhaineann le neamhláithreachta an chúntóra riachtanas speisialta a choinneáil in áit shlán shábháilte agus ar aon dul le beartas cosanta sonraí an fhostóra agus leis na rialacháin chosanta sonraí. Féadfar na taifid sin a roghnú lena n-íniúchadh ag oifigigh ainmnithe de chuid na Roinne.

## Saoire Uchtaíoch

### 1. An Scéim Saoire Uchtaíche

- 1.1 Rialáiltear an Scéim Saoire Uchtaíche leis an Acht um Shaoire Uchtaíoch, 1995, arna leasú.

### 2. Teidlíocht i leith Saoire Uchtaíoch

- 2.1 Is é is Saoire Uchtaíoch ann ná tréimhse 24 seachtaine as a chéile de shaoire íochta. Tosaíonn sí ar an lá a shuitear an leanbh leis an gcúntóir riachtanas speisialta uchtála.
- 2.2 Féadfaidh an tuismitheoir ainmnithe Saoire Uchtaíoch a thógáil i gcás go mbeidh lánúin ag uchtú linbh. I gcás uchtaitheoir aonair, is é/í an tuismitheoir atá ag uchtú an linbh a cháileoidh do Shaoire Uchtaíoch. Tugtar an tUchtaitheoir Cáilitheach ar thuismitheoir a thógann an tSaoire Uchtaíoch.
- 2.3 I gcás go bhfaighidh an t-uchtaitheoir cáilitheach bás, is féidir go mbeidh an tuismitheoir marthanach i dteideal Saoire Uchtaíoch. Féach [mír 13](#) le haghaidh mionsonraí faoin bhforáil sin.
- 2.4 Chun cáiliú le haghaidh Saoire Uchtaíoch, ní mór **d'Údarás Uchtála na hÉireann** an uchtáil, bíodh uchtáil choigríche nó uchtáil intíre i gceist, a chur ar bhonn foirmiúil. Is é an tÚdarás an comhlacht reachtúil neamhspleách a bhfuil freagracht air as an bpróiseas uchtála a mhaoirsiú thar ceann an Stáit.
- 2.5 I gcás go mbeidh leanbh le huchtú ag cúntóir riachtanas speisialta ar leastuismitheoir an linbh é/í, ní bheidh an cúntóir riachtanas speisialta i dteideal Saoire Uchtaíoch más rud é, sular uchtaíodh an leanbh, gur thóg a c(h)éile, a p(h)áirtnéir sibhialta nó a c(h)omhchónaitheoir Saoire Uchtaíoch nó Saoire Mháithreachais i leith an linbh sin.

### 3. Saoire Uchtaíoch Reachtúil Neamhíochta Bhreise

- 3.1 Féadfaidh cúntóir riachtanas speisialta uchtála 16 seachtaine as a chéile ar a mhéad de Shaoire Uchtaíoch reachtúil neamhíochta bhreise a thógáil, ag tosú ar an dáta tar éis na Saoire Uchtaíche reachtúla.
- 3.2 I gcás uchtáil choigríche, féadfar an tSaoire Uchtaíoch reachtúil neamhíochta bhreise ar fad, nó cuid di, a thógáil roimh an lá suímh chun cur ar chumas an chúntóra riachtanas speisialta uchtála freastal ar chruinnithe agus/nó ranganna a chuirtear ar siúl lasmuigh den Stát nó aithne a fháil ar an leanbh. Ní mór tréimhse Saoire Uchtaíche reachtúla neamhíochta breise a thógtar faoin bhforáil seo teacht chun deiridh tráth nach déanaí ná an lá deiridh roimh an lá suímh. Féadfar aon laethanta atá fágtha den tSaoire Uchtaíoch reachtúil neamhíochta bhreise a thógáil díreach tar éis dheireadh na Saoire Uchtaíche.
- 3.3 Is féidir go mbeidh aon chúntóir riachtanas speisialta a bhaineann leas as Saoire Uchtaíoch reachtúil neamhíochta bhreise i dteideal creidmheasanna ÁSPC a fháil. Ní mór don chúntóir riachtanas speisialta agus don fhostóir an t-iarraitas ar Chreidmheasanna Saoire Uchtaíche, atá ar fáil ón Roinn Coimirce Sóisialaí, a chomhlánú agus ní mór é a sheoladh ar ais chuig an Roinn



Coimirce Sóisialaí. Tá sé faoin gcúntóir riachtanas speisialta iarratas a dhéanamh ar na creidmheasanna sin.

#### **4. An t-ord nach mór Saoire Uchtaíoch a thógáil ann**

4.1 Ní mór teidlíochtaí Saoire Uchtaíche a thógáil san ord seo a leanas:

- a) Saoire Uchtaíoch reachtúil (suas go dtí 24 seachtaine as a chéile ar a mhéad)
- b) Saoire Uchtaíoch reachtúil neamhíochta bhreise (suas go dtí 16 seachtaine as a chéile ar a mhéad). I gcás uchtáil choigríche, féadfar an tSaoire Uchtaíoch reachtúil neamhíochta bhreise ar fad, nó cuid di, a thógáil roimh an suíomh
- c) Ní mór Saoire Tuismitheora a thosú ar an lá díreach tar éis na Saoire Uchtaíche atá i gceist.

4.2 I gcás go n-úsáidfeadh na cineálacha Saoire Uchtaíche uile, de réir mar is cuí do gach duine aonair, is é an chéad lá oibre eile a bheidh sa dáta a atosóidh an cúntóir riachtanas speisialta uchtála dualgais.

#### **5. Am saor ón obair le haghaidh freastal ar Ranganna agus Cruinnithe Réamh-Uchtála laistigh den Stát**

5.1 Beidh cúntóir riachtanas speisialta uchtála i dteideal am saor ón obair a fháil, gan pá a chailleadh, le haghaidh freastal ar ranganna nó cruinnithe réamhuchtála laistigh den Stát, ar ranganna nó cruinnithe iad a gceanglaítear orthu freastal orthu mar chuid den phróiseas uchtála.

5.2 Ba cheart fógra dhá sheachtain a thabhairt faoi gach neamhláithreacht dá dtagraítear sa mhír seo agus ba cheart fianaise dhoiciméadach chuí a thabhairt ina leith.

5.3 Íocfaidh an Roinn/an Bord Oideachais agus Oiliúna as cumhdach ionaid i dtaca le neamhláithreachtaí den sórt sin.

#### **6. Nósanna Imeachta Iarratais**

6.1 Ní mór don chúntóir riachtanas speisialta uchtála iarratas ar gach cineál Saoire Uchtaíche, bíodh sí íochta nó neamhíochta, a dhéanamh chuig a f(h)ostóir sé seachtaine ar a laghad roimh an dáta tosaithe beartaithe ach úsáid a bhaint as an bhFoirm Iarratais in Aguisín A a ghabhann leis an gCiorclán seo.

6.2 Chun leas a bhaint as Sochar Uchtaíoch reachtúil, ní mór don chúntóir riachtanas speisialta uchtála Foirm AB1 ón Roinn Coimirce Sóisialaí a chomhlánú agus ba cheart don chúntóir riachtanas speisialta uchtála a chinntiú go gcomhlánóidh an fostóir an rannán fostóra. Ní mór don chúntóir riachtanas speisialta uchtála an fhoirm chomhlánaithe a chur ar aghaidh chuig an Roinn Coimirce Sóisialaí sé seachtaine ar a laghad roimh dháta tosaithe na saoire (nuair is féidir). NÍOR cheart Foirm AB1 a sheoladh chuig an Roinn Oideachais.

- 6.3 I gcás uchtáil intíre, ní mór don chúntóir riachtanas speisialta uchtála *Deimhniú Suímh* arna eisiúint ag Údarás Uchtála na hÉireann a thabhairt don fhostóir tráth nach déanaí ná ceithre seachtaine tar éis an lae suímh. Sonraítear sa *Deimhniú Suímh* an lá suímh, inscne agus aois an linbh atá á (h)uchtú, agus ainm agus seoladh an tuismitheora uchtála.
- 6.4 I gcás uchtáil choigríche, ní mór don chúntóir riachtanas speisialta uchtála *Dearbhú Incháilitheachta agus Oiriúnachta* arna eisiúint ag Údarás Uchtála na hÉireann a thabhairt don fhostóir roimh an lá suímh. Sonraítear sa Dearbhú sin an lá suímh, inscne agus aois an linbh atá á (h)uchtú, agus ainm agus seoladh an tuismitheora uchtála. Ba cheart don chúntóir riachtanas speisialta uchtála deimhniú i scríbhinn a thabhairt dá f(h)ostóir faoin suíomh a luaithe is féidir tar éis an lae suímh.

## **7. Saoire a Thaifeadadh**

- 7.1 Ní mór don fhostóir an neamhláithreach Saoire Uchtaíche a thaifeadadh ar an gCóras Éileamh ar Líne/ar chóras an Bhoird Oideachais agus Oiliúna lena mbaineann tráth nach déanaí ná sé seachtaine roimh thosú na saoire.
- 7.2 Is ar fáil in [Aguisín B](#) a ghabhann leis an gCiorclán seo atá an nós imeachta le haghaidh neamhláithreachtaí Saoire Uchtaíche a thaifeadadh ar an gCóras Éileamh ar Líne.
- 7.3 Tá ríomh samplach Saoire Uchtaíche tugtha in [Aguisín C](#) a ghabhann leis an gCiorclán seo.

## **8. Socruithe Pá agus Sochar Uchtaíoch**

- 8.1 Ní teidlíocht reachtúil é leanúint le tuarastal a íoc le linn Saoire Uchtaíoch agus ba cheart fógra a thabhairt don Phámháistir láithreach faoi aon bheart a bhfuil sé riachtanach tuarastal cúntóra riachtanas speisialta a choigeartú dá bharr.
- 8.2 Ioncam inchánach is ea íocaíocht Sochair Uchtaíoch.
- 8.3 Faoi na rialacháin ón Roinn Coimirce Sóisialaí, is iad seo a leanas na socruithe atá i bhfeidhm do ranníocóirí ÁSPC:
- Ráta iomlán (Aicme A): Eiseofar go díreach chuig an gcúntóir riachtanas speisialta aon Sochar Uchtaíoch atá le híoc ag an Roinn Coimirce Sóisialaí agus cuirfidh an Pámháistir asbhaint ón tuarastal i bhfeidhm a bheidh coibhéiseach le ráta seachtainiúil uasta an tSochair Uchtaíoch.
  - Ráta modhnaithe (Aicme D): Níl aon teidlíocht ann i leith Sochar Uchtaíoch. Dá bhrí sin, ní chuirtear aon asbhaint i bhfeidhm maidir le tuarastal an chúntóra riachtanas speisialta agus faigheann an cúntóir riachtanas speisialta a g(h)náth-thuarastal fós.
- 8.4 I gcás gur lú méid an tSochair Uchtaíoch atá iníoctha leis an gcúntóir riachtanas speisialta ná an méid uasta, nó i gcás nach mbeidh an cúntóir riachtanas speisialta i dteideal aon Sochar Uchtaíoch a fháil, ba cheart don

chúntóir riachtanas speisialta fógra a thabhairt don Phámháistir faoi sin láithreach chun a chinntiú go mbeidh sé/sí in ann leanúint leis an tuarastal cui a fháil.

- 8.5 Féadfar athruithe a dhéanamh ar an asbhaint uathoibríoch ar choinníoll go dtabharfaidh an cúntóir riachtanas speisialta don Phámháistir cóip den fhógra i scríbhinn ón Roinn Coimirce Sóisialaí faoin ráta iarbhír Sochair Uchtaíoch is infheidhme, más ann. I gcás gur cuí déanamh amhlaidh, déanfar asbhaintí gach coicís le linn na tréimhse Saoire Uchtaíche reachtúla íoctha suas go dtí 24 seachtaine ar a mhéad. I gcás go dtaifeadfar na neamhláithreachtaí Saoire Uchtaíche go mall ar an gCóras Éileamh ar Líne/ar chóras an Bhoird Oideachais agus Oiliúna lena mbaineann, asbhainfear aon riaráiste ó thuarastal an chúntóra riachtanas speisialta.

## **9. Stádas le linn Saoire Uchtaíoch**

- 9.1 Aon chúntóir riachtanas speisialta atá as láthair ar cheann ar bith de na cineálacha Saoire Uchtaíche dá dtagraítear thíos, measfar é/í a bheith i mbun fostaíochta ag an am sin.

- a) Is ináirithe go hiomlán atá Saoire Uchtaíoch íoctha chun gach críche, lena n-áirítear dul chun cinn ar an scála tuarastail bhreisíoch agus sinsearach.
- b) Is ináirithe atá Saoire Uchtaíoch reachtúil neamhíoctha bhreise chun gach críche, seachas chun críche luach saothair agus chun críche aoisliúntais.

## **10. Cúntóir Riachtanas Speisialta Ionaid**

- 10.1 Féadfaidh an fostóir cúntóir riachtanas speisialta ionaid a cheapadh, ar duine é/í a n-íocfaidh an Pámháistir leis/léi de réir na bhfoilseachán iomchuí ón Roinn, le linn do chúntóir riachtanas speisialta bheith as láthair ar Shaoire Uchtaíoch. Ní mór don fhostóir an ceapachán sin a thaifeadadh ar an gCóras Éileamh ar Líne/ar chóras an Bhoird Oideachais agus Oiliúna lena mbaineann.
- 10.2 I gconarthaí a dhámhtar chun neamhláithreachtaí Saoire Uchtaíche a chumhdach, ba cheart tagairt shoiléir a dhéanamh don fhíríc gur féidir go mbeidh sé riachtanach ceapachán an chúntóra riachtanas speisialta ionaid a fhoirceannadh i gcás go bhfillfidh an cúntóir riachtanas speisialta atá as láthair ar dhualgais níos luaithe ná mar a bhíodhas ag súil leis (e.g., i gcás go gcuirfidh cúntóir riachtanas speisialta atá as láthair cuid den tSaoire Uchtaíoch ar atráth toisc go bhfuil an leanbh san ospidéal).
- 10.3 I gcás go bhfostófar cúntóir riachtanas speisialta ionaid, ní ghnóthóidh sé/sí aon sinsearach sa scoil.

## **11. Fostaíocht le linn Saoire Uchtaíoch a Thógáil**

- 11.1 Ní fhéadfaidh cúntóir riachtanas speisialta atá as láthair ar Shaoire Uchtaíoch gabháil d'aon chineál fostaíochta íoctha eile.

11.2 Faoi na rialacháin ón Roinn Coimirce Sóisialaí, féadfar Sochar Uchtaíoch a fhoirceannadh i gcás go ngabfaidh cúntóir riachtanas speisialta d'fhostaíocht íoctha agus é/í ar Shaoire Uchtaíoch.

11.3 Athbhreithneoidh an Pámháistir íoc an tuarastail i gcás fhoirceannadh an tSochair Uchtaíoch toisc nár comhlíonadh téarmaí na Scéime Sochair Uchtaíoch.

## **12. Saoire Uchtaíoch a Chur ar Atráth**

12.1 I gcás go gcuirfean an lá suímh ar atráth, féadfar dáta tosaithe na Saoire Uchtaíche a chur ar atráth freisin, ar choinníoll go dtabharfar fógra don fhostóir faoin lá suímh nua a luaithe is féidir.

12.2 I gcás go gcuirfean an leanbh san ospidéal, féadfar iarraidh a dhéanamh chuig an bhfostóir ar na nithe seo a chur ar atráth:

- a) Saoire Uchtaíoch reachtúil
- b) Saoire Uchtaíoch reachtúil neamhíoctha bhreise
- c) Saoire Reachtúil Tuismitheora Mharthanaigh
- d) Saoire reachtúil neamhíoctha bhreise Tuismitheora Mharthanaigh

12.3 I gcás go gcuirfean Saoire Uchtaíoch ar atráth, beidh ar an gcúntóir riachtanas speisialta atá as láthair dualgais a atosú sa scoil le linn thréimhse an chuir ar atráth.

12.4 Ní mór iarraitas ar chur ar atráth a dhéanamh i scríbhinn chuig an bhfostóir agus ní mór deimhniú ón ospidéal a bhfuil an leanbh ann a chur isteach ina theannta. Ní mór don fhostóir fógra i scríbhinn faoin gcinneadh uaidh a thabhairt don chúntóir riachtanas speisialta a luaithe is féidir. I gcás go gcuirfean an tsaoire ar atráth, ní mór don fhostóir agus don chúntóir riachtanas speisialta dáta an fhillidh ar an obair a chomhaontú.

12.5 Ní mór fógra a thabhairt don Pámháistir agus don Roinn Coimirce Sóisialaí i gcás go mbeidh an cúntóir riachtanas speisialta le filladh ar an obair. Ní mór déanamh amhlaidh chun coigeartú pá a éascú, chun scor d'aon sochar ón Roinn Coimirce Sóisialaí agus chun an íocaíocht leis an gcúntóir riachtanas speisialta ionaid a thabhairt chun críche.

12.6 Ní mór an tsaoire atá curtha ar atráth a thógáil i dtréimhse leanúnach amháin a thosóidh tráth nach déanaí ná seacht lá tar éis an leanbh a scaoileadh amach ón ospidéal. Is é sé mhí an tréimhse uasta le haghaidh an tsaoire a chur ar atráth.

12.7 Ní mór don chúntóir riachtanas speisialta litir nó doiciméad cuí eile ón ospidéal nó ó dhochtúir an linbh ina ndeimhnítear an dáta a scaoileadh an leanbh amach a thabhairt don fhostóir.

12.8 I gcás go dtiocfaidh tinneas ar an gcúntóir riachtanas speisialta tar éis dó/di filladh ar an obair agus roimh dó/di an tsaoire atá curtha ar atráth a thógáil, measfar gur thosaigh sé/sí an tsaoire atá curtha ar atráth ar an gcéad lá den

neamhláithreacht de bharr tinnis ach amháin i gcás go dtabharfaidh an cúntóir riachtanas speisialta fógra don fhostóir nach mian leis/léi an tsaoire atá curtha ar atráth a thosú. I gcás go dtarlóidh sé sin, géillfidh sé/sí an tsaoire atá curtha ar atráth agus déileálfar leis an neamhláithreacht mar Shaoire Bhreiteachta. Ba cheart cloí ansin leis na gnáthnósanna imeachta maidir le Saoire Bhreiteachta, lena n-áirítear deimhniú dochtúra a thabhairt nuair is cuí.

### **13. Saoire Tuismitheora Mharthanaigh**

- 13.1 I gcás go bhfaighidh an t-uchtaitheoir cáilitheach bás am ar bith roimh a S(h)aoire Uchtaíoch nó lena linn, beidh an tuismitheoir marthanach i dteideal an chuid atá fágtha den tsaoire a fháil.
- 13.2 Ba cheart don tuismitheoir marthanach fógra a thabhairt dá f(h)ostóir a luaithe is féidir go bhfuil sé ar intinn aige/aici Saoire Uchtaíoch agus/nó Saoire Uchtaíoch reachtúil neamhíochta bhreise a thógáil.
- 13.3 Ba cheart an Deimhniú Suímh, nó Dearbhú Incháilitheachta agus Oiriúnachta, a thabhairt don fhostóir laistigh de cheithre seachtaine ón suíomh/ón tsaoire a thosú.
- 13.4 Ba cheart an tsaoire a thosú de ghnáth laistigh de sheacht lá tar éis na heachtra a chruthaigh teidlíocht an tuismitheora mharthanaigh i leith na saoire (nó ar an lá suímh, cibé acu is déanaí) ach ba cheart don fhostóir lánrogha atá oiriúnach do na himthosca aonair a fheidhmiú. Chun leas a bhaint as a t(h)eidlíocht saoire, féadfaidh an tuismitheoir marthanach sna himthosca seo iarratas i scríbhinn a dhéanamh chuig a f(h)ostóir, gan aon rud eile a dhéanamh. A luaithe is féidir le réasún, ba cheart cóip de dheimhniú báis an uchtaitheora cháilithigh a thabhairt don fhostóir.
- 13.5 Beidh feidhm ag an socrú seicheamhaithe atá leagtha amach i [Mír 4](#) maidir leis an tSaoire Tuismitheora Mharthanaigh freisin:
  - a) Saoire Tuismitheora Mharthanaigh (aon chuid atá fágtha de theidlíocht 24 seachtaine an uchtaitheora cháilithigh i leith Saoire Uchtaíoch a aistriú chuig an tuismitheoir marthanach)
  - b) Saoire reachtúil neamhíochta bhreise Tuismitheora Mharthanaigh (aon chuid eile de theidlíocht an uchtaitheora cháilithigh i leith Saoire reachtúil neamhíochta bhreise 16 seachtaine sa bhreis a aistriú chuig an tuismitheoir marthanach)
  - c) Ní mór Saoire Tuismitheora a thosú ar an lá díreach tar éis na Saoire Tuismitheora Mharthanaigh atá i gceist.

### **14. Saoire Uchtaíoch Reachtúil Neamhíochta Bhreise/Saoire Reachtúil Neamhíochta Bhreise Tuismitheora Mharthanaigh a Fhoirceannadh**

- 14.1 Féadfar iarratas ar Shaoire Uchtaíoch reachtúil neamhíochta bhreise, nó Saoire reachtúil neamhíochta bhreise Tuismitheora Mharthanaigh, a tharraingt siar i scríbhinn ar chúis ar bith suas go dtí ceithre seachtaine roimh

dháta tosaithe beartaithe na saoire sin. I gcás go n-imeoidh an tréimhse cealaithe ceithre seachtaine dá bhforáiltear san Acht thart, caillfear an teidlíocht i leith iarratas a tharraingt siar.

- 14.2 I gcás tinnis, áfach, féadfar iarraidh fhoirmiúil a dhéanamh chuig an bhfostóir fós, fiú tar éis thosú thréimhse na saoire sin, ar an tsaoire a fhoirceannadh i bhfabhar neamhláithreachta Saoire Breoiteachta deimhnithe. Tá sé faoi lánrogha an fhostóra a chinneadh cé acu a cheadófar nó nach gceadófar iarraidh ar an tSaoire Uchtaíoch/an tSaoire Tuismitheora Mharthanaigh a fhoirceannadh. I gcás go gceadófar an iarraidh, ní mór don fhostóir agus don chúntóir riachtanas speisialta an dáta le haghaidh an tsaoire a fhoirceannadh a chomhaontú. Ní ceadmhach an dáta comhaontaithe a bheith níos luaithe ná an chéad lá den tinneas deimhnithe agus ní ceadmhach é a bheith níos déanaí ná an dáta a thiofadh an tSaoire Uchtaíoch fhoirceanta/an tSaoire fhoirceanta Tuismitheora Mharthanaigh chun deiridh ar shlí eile. Beidh feidhm ansin ag na gnáthnósanna imeachta maidir le Saoire Bhreoiteachta. Ní bheidh an cúntóir riachtanas speisialta i dteideal ina dhiaidh sin an tSaoire Uchtaíoch reachtúil neamhíoctha bhreise/an tSaoire reachtúil neamhíoctha bhreise Tuismitheora Mharthanaigh nó aon chuid di a thógáil.
- 14.3 Chun an coigeartú riachtanach pá a éascú, ní mór don fhostóir fógra a thabhairt don Phámháistir go bhfuil an cúntóir riachtanas speisialta ar Shaoire Bhreoiteachta anois.

## **15. Suíomh a Fhoirceannadh**

- 15.1 I gcás go bhfoirceannfar suíomh aon linbh le cúntóir riachtanas speisialta roimh dhul as feidhm na Saoire Uchtaíche nó na Saoire Uchtaíche reachtúla neamhíoctha breise, seachas i gcás go bhfoirceannfar é de dheasca bhás an linbh, ní mór don chúntóir riachtanas speisialta fógra i scríbhinn a thabhairt don fhostóir faoi dháta an fhoirceanta laistigh de sheacht lá. Tiofadh an tSaoire Bhreoiteachta chun deiridh ar dháta an fhoirceanta.

## **16. Filleadh ar an obair tar éis Saoire Uchtaíoch**

- 16.1 Ba cheart don fhostóir ráiteas i scríbhinn a thabhairt don chúntóir riachtanas speisialta atá as láthair faoina neamhláithreachta agus faoin dáta ionchais a atosófar dualgais. Ba cheart fógra i scríbhinn ón gcúntóir riachtanas speisialta a thabhairt don fhostóir ceithre seachtaine sula bhfuil sé/sí le fillleadh, á dheimhniú go bhfuil sé ar intinn aige/aici dualgais a atosú ar an dáta sin.

## **17. Teidlíocht Reachtúil i leith Saoire Bhliantúil/Laethanta Saoire Poiblí**

- 17.1 Rialáiltear an teidlíocht i leith Saoire Bhliantúil Reachtúil agus Laethanta Saoire Poiblí Reachtúla leis an Acht um Eagrú Ama Oibre, 1997 (arna leasú). Tríd is tríd, tá fostaithe lánaimseartha i dteideal Saoire Bhliantúil 20 lá ar a laghad a thógáil i ngach bliain saoire.
- 17.2 Maidir le fostaithe ar lú na huairanta a oibríonn siad ná uaireanta lánaimseartha, tá siad i dteideal Saoire Bhliantúil ar bhonn pro rata.

- 17.3 Tabharfar Saoire Bhliantúil bhreise in ionad Laethanta Saoire Poiblí a thiteann le linn don chúntóir riachtanas speisialta bheith as láthair ar Shaoire Uchtaíoch.
- 17.4 Ba cheart teidlíochtaí Saoire Bliantúla a thógáil ar laethanta dúnta scoile atá ann cheana a thiteann le linn na bliana saoire lena mbaineann. I gcás go mbeidh cúntóir riachtanas speisialta ag baint leas as cineál eile saoire lasmuigh de laethanta dúnta scoile nó gur bhain sé/sí leas as cineál eile saoire lasmuigh de laethanta dúnta scoile (e.g., Saoire Bhreiteachta/Saoire Mháithreachais), ba cheart an tSaoire Bhliantúil a thógáil roimh an tsaoire lena mbaineann nó ina dhiaidh.
- 17.5 I gcás nach mbeidh go leor laethanta dúnta scoile ann sa bhliain saoire chun na teidlíochtaí Saoire Bliantúla uile a ionsú, is ceadmhach na laethanta riachtanacha a thógáil díreach roimh Shaoire Uchtaíoch. Féadfaidh cúntóirí riachtanas speisialta an tsaoire atá fágtha acu a thabhairt ar aghaidh chuig an mbliain saoire ina dhiaidh sin freisin, ach ní mór dóibh an tsaoire sin a thógáil le linn laethanta dúnta scoile.
- 17.6 Aon chúntóir riachtanas speisialta a éireoidh as/a rachaidh ar scor nó a scoirfear dá f(h)ostaíocht, is féidir go mbeidh sé/sí i dteideal íocaíocht bhreise a fháil in ionad na Saoire atá fabhráithe aige/aici.

## Aguisín A - Foirm Iarratais ar Shaoire Uchtaíoch

**Ba cheart an Fhoirm Iarratais a chomhlánú go hiomlán agus a chur isteach chuig an bhfostóir sé seachtaine ar a laghad roimh an dáta tosaithe beartaithe.**

Más rud é go n-íocann an cúntóir riachtanas speisialta ranníocaíochtaí ÁSPC Aicme A, ba cheart Foirm AB1 chomhlánaithe a chur isteach chuig an Roinn Coimirce Sóisialaí. Is féidir an Fhoirm sin a fháil ón Roinn Coimirce Sóisialaí nó ar líne ag [www.gov.ie](http://www.gov.ie)

### CUID 1A - IARRATAS AN CHÚNTÓRA RIACHTANAS SPEISIALTA

Ainm an CRS: \_\_\_\_\_ Uimh. Theagmhála: \_\_\_\_\_

Seoladh Baile: \_\_\_\_\_

Seoladh Ríomhphoist: \_\_\_\_\_

UPSP: \_\_\_\_\_

Ainm na Scoile: \_\_\_\_\_ Uimh. Rolla: \_\_\_\_\_

BAINEANN AN T-IARRATAS LE: (cuir tic leis an rogha chuí)

- Saoire Uchtaíoch reachtúil (24 seachtaine)
- Saoire Uchtaíoch reachtúil neamhíochta bhreise (suas go dtí 16 seachtaine ar a mhéad)

### CUID 1B – MIONSONRAÍ FAOIN tSAOIRE UCHTAÍOCH

An lá suímh ionchais: \_\_\_\_/\_\_\_\_/\_\_\_\_

*(Ba cheart Deimhniú Suímh a chur isteach chuig an bhfostóir tráth nach déanaí ná ceithre seachtaine tar éis an lae suímh. I gcás uchtáil choigríche, ba cheart Dearbhú Incháilitheachta agus Oiriúnachta a thabhairt don fhostóir roimh an suíomh).*

#### **Saoire Uchtaíoch Reachtúil (24 seachtaine):**

Ón \_\_\_\_\_ go dtí an \_\_\_\_\_ (an dá dháta san áireamh)

#### **Saoire Uchtaíoch Reachtúil Neamhíochta Bhreise (suas go dtí 16 seachtaine ar a mhéad):**

I gcás uchtáil choigríche, luaigh na dátaí má tá cuid ar bith den tSaoire Uchtaíoch reachtúil neamhíochta bhreise le tógáil roimh an suíomh:

Ón \_\_\_\_\_ go dtí an \_\_\_\_\_ (an dá dháta san áireamh)



**Dearbhú**

Is mian liom iarratas a dhéanamh ar Shaoire Uchtaíoch i gcomhréir leis an Scéim Saoire Uchtaíche atá leagtha amach i gCiorclán 0048/2023 dar teideal 'An Scéim Saoire Uchtaíche do Chúntóirí Riachtanas Speisialta atá fostaithe i mBunscoileanna agus lar-bhunscoileanna Aitheanta'.

Deimhním gur fíor agus cruinn atá an fhaisnéis atá tugtha san iarratas.

Síniú an Chúntóra Riachtanas Speisialta: \_\_\_\_\_ Dáta: \_\_\_\_\_

**Ráiteas Príobháideachta maidir le Cosaint Sonraí**

Is é an príomhchuspóir ar ina leith a cheanglaíonn an Roinn ort na sonraí pearsanta sin a thabhairt do d'fhostóir ná chun cabhrú le d'iarratas ar Shaoire Uchtaíoch a phróiseáil. Coinneoidh d'fhostóir d'fhoirm iarratais agus do dhoiciméid tionlacain i gcomhréir lena bheartas Cosanta Sonraí. Beidh tuilleadh faisnéise maidir leis an mbeartas sin ar fáil ach í a iarraidh ó d'fhostóir.

Is féidir an Fógra Príobháideachta ina dtugtar tuilleadh faisnéise maidir leis an bhfoirm iarratais seo a fháil ag [gov.ie](http://gov.ie). Tá mionsonraí iomlána faoi bheartas Cosanta Sonraí na Roinne ar fáil ag [gov.ie](http://gov.ie), áit a leagtar amach an dóigh a n-úsáidfimid do shonraí pearsanta agus a dtugtar faisnéis maidir leis na cearta atá agat mar ábhar sonraí. Tá mionsonraí faoin mbeartas sin ar fáil i gcóip chrua freisin ón seoladh seo ach iad a iarraidh: An Rannán Téarmaí agus Coinníollacha - Múinteoirí agus Cúntóirí Riachtanas Speisialta, An Roinn Oideachais, Corr na Madadh, Baile Átha Luain, Co. na hIarmhí, N37 X659.

**CUID 2 – AN CINNEADH ÓN bhFOSTÓIR**

Deimhním gur cheadaigh mé an tSaoire Uchtaíoch/gur dhiúltaigh mé don tSaoire Uchtaíoch (scrios de réir mar is cuí) i gcomhréir leis an Scéim Saoire Uchtaíche atá leagtha amach i gCiorclán 0048/2023 dar teideal ‘An Scéim Saoire Uchtaíche do Chúntóirí Riachtanas Speisialta atá fostaithe i mBunscoileanna agus Iar-bhunscoileanna Aitheanta’. Coinneofar na doiciméid seo a leanas chun críocha iniúchóireachta:

- |    |   |                          |
|----|---|--------------------------|
| 1) | Iarratas ar Shaoire Uchtaíoch   | <input type="checkbox"/> |
| 2) | Deimhniú Suímh/Dearbhú Incháilitheachta agus Oiriúnachta                      | <input type="checkbox"/> |
| 3) | Cóip den Fhógra Cinnidh arna eisiúint chuig an gcúntóir riachtanas speisialta | <input type="checkbox"/> |

Taifeadadh an tSaoire Uchtaíoch Cheadaithe ar an gCóras Éileamh ar Líne/ar chóras an Bhoird Oideachais agus Oiliúna lena mbaineann

Síniú: \_\_\_\_\_ Dáta: \_\_\_\_\_  
(Fostóir)

***NÍOR cheart an Fhoirm Iarratais/Doiciméid Tacaíochta a chur isteach chuig an Roinn Oideachais. Ba cheart iad a choinneáil sa scoil/sa Bhord Oideachais agus Oiliúna mar aon le haon doiciméid ábhartha eile chun críocha taifid a choinneáil agus chun críocha iniúchóireachta i dteannta na dtaifead pearsanra lena mbaineann.***

## **Aguisín B - Nósanna imeachta a bhaineann le Saoire Uchtaíoch a Thaifeadadh ar an gCóras Éileamh ar Líne**

- 1) Clliceáil ar ‘Cuir Leis’ faoi ‘Saoire’ ar roghchlár an Chórais Éileamh ar Líne
- 2) Iontráil dáta tosaithe agus dáta deiridh na saoire.
  - Clliceáil ar ‘Ar Aghaidh’
- 3) Roghnaigh an ball foirne atá ar saoire
  - Roghnaigh an chatagóir saoire – Saoire Teaghlaigh agus
  - Roghnaigh an fhochatagóir saoire – Saoire UchtaíochI dtaca le Saoire Uchtaíoch, ba cheart 168 lá (24 seachtaine) a bheith ar an líon iomlán laethanta atá sa raon.
  - Clliceáil ar ‘Ar Aghaidh’
- 4) Clliceáil ar ‘Cuir Leanbh Leis’ agus iontráil mionsonraí
  - Clliceáil ar ‘Cuir Leis’

### Faisnéis chun Cabhrú le Fostóirí [Foirm AB1](#) a Chomhlánú

- Chun cabhrú leis an rannán Fostóra d’Fhoirm AB1 a chomhlánú, taispeántar liosta de na seachtainí ÁSPC don bhliain reatha agus don bhliain roimhe ar an gCóras Éileamh ar Líne.
- I gcás go mbeidh 52 sheachtain ar an líon iomlán seachtainí ÁSPC don bhliain cánach roimhe agus go mbeidh an cúntóir riachtanas speisialta i mbun fostaíocht leanúnach ón uair sin i leith, is é 52 sheachtain an líon iomlán seachtainí atá le hiontráil. I gcás gur lú ná 52 sheachtain an líon iomlán seachtainí agus go mbeidh conradh ag an gcúntóir riachtanas speisialta go dtí dáta tosaithe a S(h)aoire Uchtaíche, is ionann an líon iomlán seachtainí agus suim na seachtainí ÁSPC sa bhliain cánach roimhe móide na seachtainí ÁSPC sa bhliain cánach reatha go dtí dáta tosaithe a S(h)aoire Uchtaíche.
- Iontráil an Uimhir Chláráithe Fostóra chuí, agus déan an fhoirm a shíniú, a dhátú agus a stampáil dá réir

Is é 9599516K an Uimhir Chláráithe Fostóra do chúntóirí riachtanas speisialta

- Clliceáil ar ‘Cuir Leis’. Taispeántar teachtaireacht deimhnithe.

### Saoire Uchtaíoch Bhreise (Neamhíoctha)

Tá sé tábhachtach a thabhairt faoi deara nach féidir na neamhláithreachtaí Saoire Uchtaíche Neamhíoctha a iontráil ar an gCóras Éileamh ar Líne go dtí an chéad lá oibre eile tar éis fógra a thabhairt faoin tSaoire Uchtaíoch. Ní mór don Phámháistir an tSaoire Uchtaíoch a fhíorú ar dtús chun asbhaintí ón tuarastal a thosú.

## Aguisín C - Ríomh Samplach Saoire Uchtaíche

Tá an sampla bunaithe ar an 19 Meán Fómhair 2023 a bheith ar an lá suímh agus ar úsáid iomlán a bheith á baint as an 112 lá de Shaoire Uchtaíoch reachtúil neamhíochta bhreise (ar tógadh roinnt díobh roimh an lá suímh agus ar tógadh roinnt díobh tar éis na Saoire Uchtaíche).

Cineál Saoire	Na dátaí a tógadh an tsaoire
(1) Saoire Uchtaíoch Reachtúil (24 seachtaine) <i>(is é an lá suímh an dáta tosaithe)</i>	Ón: 19 Meán Fómhair 2023 Go dtí an: 4 Márta 2024
(2) Saoire Uchtaíoch Reachtúil Neamhíochta Bhreise <u>roimh an lá suímh</u> (16 seachtaine, nó 112 lá, ar a mhéad) <sup>1</sup>  i. Sa sampla seo, tógtar 11 lá neamhíochta roimh an lá suímh chun aithne a fháil ar an leanbh in uchtáil choigríche. ii. Tá 101 lá le tógáil fós ón leithdháileadh 112 lá de Shaoire Uchtaíoch reachtúil neamhíochta bhreise	Ón: 8 Meán Fómhair 2023 Go dtí an: 18 Meán Fómhair 2023  (11 lá)
(3) Saoire Uchtaíoch Reachtúil Neamhíochta Bhreise (16 seachtaine, nó 112 lá, ar a mhéad) Sa sampla seo, tógadh 11 lá cheana féin roimh an suíomh [féach (1) thuas], rud a fhágann go bhfuil suas go dtí 101 lá le tógáil anois. Sa chás seo, tógtar an 101 lá ar fad atá le tógáil.	Ón: 5 Márta 2024 Go dtí an: 13 Meitheamh 2024  (101 lá, an dá dháta sin san áireamh)
(4) An dáta sealadach atosaithe tar éis Saoire Uchtaíoch Reachtúil Neamhíochta Bhreise (i gcás nach dtógtar aon saoire eile, is é sin an dáta ba cheart don chúntóir riachtanas speisialta fillleadh ar dhualgais scoile)	14 Meitheamh 2024

<sup>1</sup> Uchtáil choigríche: I gcás go mbeidh tréimhse Saoire Uchtaíche Reachtúla Neamhíochta Breise ag teastáil roimh an lá suímh chun freastal ar chruinnithe lasmuigh den Stát nó chun aithne a fháil ar an leanbh atá le huchtú, féadfar an tSaoire Uchtaíoch Reachtúil Neamhíochta Bhreise ar fad, nó cuid di, a thógáil roimh an lá suímh.